


預告舞台劇再度公演

華仔延續經典 再「劫」觀眾荷包

由朱栢康、魯文傑、麥沛東、芯聆等主演的舞台劇《你好，打劫！Reunion》12場演出圓滿閉幕，出品人劉德華前日下午尾場再度現身，與劇中主角一起謝幕。難得遇上好劇本，華仔有意將劇目延續成為經典，他向觀眾說：「我哋呢班人，喺適當嘅時候會對住你哋荷包講『你好……打劫』！」預告會再度公演。



華仔率領演員一齊謝幕。



難得遇上好劇本，華仔預告將原班人馬再演《你好，打劫！Reunion》。

舞台劇《你好，打劫！Reunion》12場演出順利完成，華仔有感難得遇上好劇本，希望將這個劇目成為經典，一直公演下去！他說：「只要Book到場就再嚟啦，你哋邊個得閒就埋位！」台前幕後即興奮和應！首次參演舞台劇的芯聆感謝團隊包容和鼓勵，她坦言演完最後一場整個人放鬆下來：「因為演出最後一幕已經喊乾晒眼淚，開場前反而想喊，因為12場咁快就完咗，好唔捨得。自己第一次參演舞台劇，可以遇上一班咁好嘅班底，非常難得！」

麥沛東怕被芯聆粉絲報復

問到連續12晚於劇中掌摑芯聆的麥

沛東可會覺得心痛？他說：「其實係搵咗13巴，其中一晚連搵兩巴！唔止心痛，而且仲好驚！因為有朋友問我擔唔擔心收到粉絲嘅鋸刀，因為掌摑天團偶像！但芯聆演嗰場戲感情澎湃，我都要情緒爆發，忍唔住要搵佢。」芯聆感謝麥沛東掌摑力度恰恰到好處，讓她順利完成這幕演出。

好一陣子沒演出舞台劇的朱栢康表示很開心遇上一班好對手：「今次遇上呢班志同道合嘅對手，大家唔止一拍即合，仲令到我有再次享受舞台演出嘅感覺，好正！」魯文傑自爆導演朱栢謙發現有網民留言認錯留長髮的他是劉雅麗，令他哭笑不得說：「我真係入咗腦，演出嘅時候真係有一刻畀『劉雅麗』呢3個字影響，好彩我撥一撥頭髮，好快清醒過嚟！」



陳家樂(右)前來捧場，獲好友朱栢康錫面歡迎。

譚俊彥增肥保護阿佘

譚俊彥、劉穎璇、羅天宇和梁凱晴等昨日為資訊節目《警聲百二秒III》進行開鏡拜神儀式，眾星均表示支持多製作此類資訊節目，讓觀眾提高防騙意識。譚俊彥自爆曾遇電騙：「有次太太睇網劇時突然停頓，我即刻收到短訊話過期未繳費，但當我畀錢時發現變成8,000蚊，仲係孟加拉幣值，先發現被騙，但已經追唔番！」

提到他忙拍新劇《新聞女王2》，譚俊彥透露日前與佘詩曼拍車房戲時，因身材太健碩被網民誤認是樂隊Mr.成員黎澤恩：「我的確有刻意增肥，因角色似係阿佘嘅保護傘，想營造一種住家男人感覺。阿佘身形紙咁薄，唔想兩個人都咁瘦，我仲逼阿佘食多啲，但佢不停拍戲冇時間食嘢，反而愈拍愈瘦！」



左起：劉穎璇、譚俊彥和梁凱晴支持多製作防騙節目。

ANSONBEAN心理問題暫別娛圈

24歲歌手陳毅燊(ANSONBEAN)2020年參加《全民造星III》奪得季軍後入行，工作不斷。但本月初他突然刪除Ig賬戶，即傳他退出娛樂圈！事後他在社交平台回覆：「我因為心理健康同精神狀態，需要失蹤一段時間，知道咁樣係有啲不負責任，但係亦都希望大家明白。大家唔需要擔心，亦希望大家繼續加油，繼續努力做自己想做嘅事。」他表示待狀態轉好後會再跟大家見面：「希望喺一個更好嘅狀態可以同大家再見，我亦都會記住大家。」



陳毅燊希望以最佳狀態復出幕前。

周吉佩向黃博「抄牌」

《中年好聲音》3屆歌手前晚雲集將軍澳電視城錄影《中年好聲音321經典大戰》，周吉佩、古淖文與黃博分別是3屆冠軍，但未能於節目合唱大感可惜！古淖文期望將來有機會一齊合唱，又指雖然之前曾在節目跟黃博碰面，但因當時對方忙於練習，故未有多交談，今次終於可以正式交流：「我叫佢對住我同周吉佩唔使太恭敬，相信佢好快融入《中年》大家庭。」周吉佩亦稱希望3人有機會合唱：「要問黃博擺電話號碼，再開群組夾一夾。」



右起：古淖文、黃博與周吉佩。